

共同經課 - 1 創世記二十五章十九節~三十四節

19 亞伯拉罕的子以撒的世系記佇下底。亞伯拉罕生以撒。20 以撒娶利百加做某的時抵仔四十歲。伊是巴旦亞蘭地的亞蘭人彼土利的查某子，亞蘭人拉班的小妹。21 以撒因為伊的某無生子，替伊祈求耶和華；耶和華允准伊所求，伊的某利百加就懷孕。22 囡仔佇伊的腹內相夾，伊就講：「若是此款，我乜使按呢？」就去問耶和華。23 耶和華給伊講：二國佇你腹內；二族欲對你的身軀出。此族欲卡強彼族；序大的欲服事序細的。24 生產的日期到，果然腹內是雙生者。25 頭一個出來者，身體紅紅，通身軀親像皮仔衫，就給伊號名做以掃。26 隨後伊的小弟閣出來，伊的手擒以掃的腳後，就給伊號名叫雅各。二個子出世的時，以撒抵仔六十歲。27 二個囡仔漸漸大，以掃 拍獵，常常佇山野；雅各做人恬靜，常常住布棚內。28 以撒疼以掃，因為常常食伊的野味；29 利百加疼雅各。有一日，雅各煮湯，以掃對山野倒來，厭倦到極。30 以掃對雅各講：「我真厭倦，求你用此個紅的湯互我食。」因為按呢以掃亦名叫以東。31 雅各講：「你今仔日用大子的名份賣互我。」32 以掃講：「我都欲死啦，此個大子的名份對佇我有啥利益？」33 雅各講：「今仔日你著對我咒誓。」伊就對伊咒誓，將大子的名份賣互雅各。34 雅各就將餅及紅豆湯互以掃，伊就飲食，起來做伊去。這就是以掃看輕大子的名份。

共同經課 - 2 詩篇一百一十九篇一百零五節~一百一十二節

105 你的話做我腳前的燈，做我路上的光。106 你公義的判斷，我曾咒誓欲遵守，我決斷按呢行。107 我受苦到極；耶和華啊，求你照你的話互我活！108 耶和華啊，求你鑒納我的嘴所歡喜獻的謳嘍，閣將你的判詞教示我！109 我的生命常常抵著危險，猶久我無袂記得你的律法。110 歹人設羅網欲害我，總是我無偏離你的教示。111 我將你干證的話做永遠的基業，因為這是我心內所歡喜的。112 我互我的心專向你的律例，永遠遵趁，直到路尾。

or 詩篇二十五篇

1 〔大衛的詩〕耶和華啊，我的心神仰望你。2 我的上帝啊，我平素倚靠你；毋通互我見誚，毋通互我的對敵因為贏我來誇口。3 見若聽候你者的確無見誚；許個無緣故行奸詐者欲見誚。4 耶和華啊，求你將你的道路指示我，將你的路途教示我！5 求你導我佇你的真理，閣教示我，因為你是救我的上帝。我通日聽候你。6 耶和華啊，求你記念你的憐憫及你的慈愛，因為這是古早以來常常有的。7 求你毋通記念我少年的罪過及我的過失；耶和華啊，求你照你的慈愛，因為你的恩惠記念我，8 耶和華是好閣正直，所以伊欲指示罪人行正路。9 伊欲用公平引導謙遜的人，伊欲用伊的道路教示謙遜的人。10 見若守伊的約及伊的干證的人，耶和華款待in攏是用慈愛誠實。11 耶和華啊，我的罪真重，求你因為你的名赦免我。12 甚麼人敬畏耶和華，耶和華欲指示伊所著揀的路。13 伊的心神欲得著安息；伊的後裔欲承接土地。14 耶和華及敬畏伊的人親密；閣欲將伊的約指示in。15 我的目矚常常向耶和華，因為伊欲互我的腳脫離羅網。16 求你越轉向我，可憐我，因為我是孤單閣困苦。17 我的心內的憂苦真多，求你救我脫離佇我攏總的患難。18 求你看我的艱難，及我的勞苦，赦免我一切的罪。19 求你看我的對敵，因為in真多，in怨恨我真惡毒。20 求你保護我的生命，拯救我，互我無見誚，因為我倚靠你。21 願純全、正直保護我，因為我聽候你。22 上帝啊，求你救贖以色列脫離伊一切的艱苦。

共同經課 - 3 羅馬書八章一節~十一節

1 所以，許個惦佇基督耶穌的，今攏無定罪。2 因為活命的神的法，佇基督耶穌已經解放我脫離罪及死的法。3 因為律法所袂會的，是對肉體才無力，上帝就差家己的子，佇有罪的肉體的形狀，閣為著罪的緣故，佇肉體中來擬定罪惡，4 互律法的義佇咱會得滿足，就是無照肉體、是照神來行的。5 因為照肉體的，意向肉體的事；照神的，意向神的事。6 因為肉體的意向，是死；神的意向，是活閣平安。7 因為肉體的意向，是對敵上帝；因為伊無降服上帝的律法，也袂會降服，8 閣惦佇肉體的，袂會互上帝歡喜。9 獨獨上帝的神若倚起佇恁，就恁無惦佇肉體，是惦佇神。無有基督的神的，毋是伊的人。10 基督若惦佇恁，就恁的身軀因為罪死，神因為義活。11 獨獨互耶穌對死人中復活的，伊的神若倚起佇恁，就互基督耶穌對死人中復活的，也欲將伊的神就是倚起佇恁的，互恁會死的身軀復活。

共同經課 - 4 馬太福音十三章一節~九節，十八節~二十三節

1 當彼日，耶穌對厝內出去，坐佇海邊。2 有多多陣的人聚集就近伊，致到伊上船來坐，歸陣的人攏倚佇岸裡。3 就用多多項設譬喻給in講：「你看，有撒種的出去撒種；4 撒的時，有的磕落佇路邊，飛鳥到一盡食伊；5 有的磕落佇石 的地，土淺的位，因為土無深，就發真緊，6 若是日出曝伊，因為無根就枯焦；7 亦有的磕落佇荖仔內，荖仔發起，遮蔽伊；8 有的磕落佇好的土地，結實，有的百倍，有的六十倍，有的三十倍。9 有耳孔的，著聽！」18 「今此個撒種子者的譬喻恁著聽。19 見若聽天國的道理也無曉悟的，彼個歹者就到，將所撒佇伊的心的搶去；這是撒佇路邊的。20 撒佇石罅的地，這是人聽道理，連鞭歡喜承受伊，21 總是內面無根，不過是暫時若定，到為著道理抵著有患難、窘逐，連鞭著觸。22 撒佇荖仔內的，這是人聽道理，亦世間的掛慮、錢財的迷惑遮蔽彼個道理，就無結實。23 撒佇好土地的，這是人聽道理來曉悟，伊實在結實，所結的，有的百倍，有的六十倍，有的三十倍。」